

Derniera per Cologna e premiera per Nufer

A las cursas da la cuppa mundiala da passlung a Tavau n'han las atletas ed ils atlets betg pudì procurar per in exploit. Cun in'excepziun: La sonda ha la Lucernaisa Nadine Fähndrich cuntanschì il segund rang en il sprint. Per Dario Cologna e Laurien van der Graaff èsi stà la derniera a Tavau, entant che Cla-Ursin Nufer da Tujetsch ha participà l'emprima giada en ina cursa da la cuppa mundiala.

Questa dumengia, en sia davosa cursa da la carriera a Tavau n'ha *Dario Cologna* betg pudì cumbatter per in plaz davanttiers. Il Jauer è vegnì 24avel en la cursa da 15 kilometers en il stil liber. Sin il victur, il Norvegiais *Simen Hegstad Krüger*, ha Cologna pers bunamain duas minutas.

Tschintg giadas sin il podest

Dario Cologna ha absolvì en sia carriera 30 cursas da la cuppa mundiala a Tavau, quasi avant ses isch-chasa. Per ina victoria n'hai mai tanschì, dentant el è stà tschintg giadas sin il podest. La fin da la stagiun vegn il quatter-dubel campion olympic a terminar sia carriera.

Dals Svizzers ha sulet Candide Pralong pudì esser cuntent cun la cursa da 15 kilometers. Il Vallesan ha terminà la cursa sco 16avel. Grazia a quest resultat ha el era dumagnà la qualificaziun per ils gieus olympics a Peking. Manchentà be per pauc in plaz sut ils top 30 ha *Jonas Baumann*. Il curriender oriund da Lon en la Val Schons ha pers bler temp sin la davosa da trais rundas ed ha la finala stuì sa cuntentar cun il 33avel plaz.

Rimnar experientscha

Cla-Ursin Nufer ch'ha 20 onns ha dastgà dar a Tavau ses debüt en la cuppa mundiala. Il giuven passlunghist tuatschin ha pers var quatter minutas sin il victur e terminà la cursa sco 80avel. Per Nufer n'èsi dentant betg i en emprima lingia per puncts, mabain per rimnar experientscha en sia emprima cursa cun l'elita mundiala. I saja stà «coolira», uschia Cla-Ursin Nufer en l'arrivada.

Gudagnà la cursa da 15 kilometers en il stil liber ha *Simen Hegstad Krüger*, quai a moda suverana, avant ses cumpatriot *Johannes Hoesflot Klaebo*. Cumplettà il podest sco terz ha il Russ *Sergey Ustiugov*.

Las passlunghistas svizras han trumpà

En la cursa da las dunnas sur 10 kilometers en il stil liber han trumpà las passlunghistas svizras. Sco 30avla hai dà dumengia puncts mo per *Nadine Fähndrich*. Schizunt stuì dar si la cursa ha *Laurien van der Graaff*. Sco per Dario Cologna èsi er stà per ella la davosa cursa da la carriera a Tavau. Gudagnà la cursa da las dunnas ha *Therese Johaug*. La Norvegiaisa ha

battì l'Americana *Jessie Diggins*, e cumpletta il podest sco terza ha la Svedaisa *Frida Karlsson*.

Nadine Fähndrich sin il podest

La suletta atleta svizra ch'ha procurà per in bun resultat a las cursas da la cuppa mundiala da Tavau è stada Nadine Fähndrich. La sonda ha ella briglià en il sprint. La Lucernaisa è vegnida segunda davos la Svedaisa *Maja Dahlqvist*. Avant in onn aveva Fähndrich anc manchentà be piz a cup il podest sco quarta. Nadine Fähndrich è in summa l'emprima Svizra ch'ha cuntanschì uschia il podest en la cursa da sprint da la cuppa mundiala a Tavau.

Tar ils umens ha triumfà la sonda en il sprint il grond favorit Johannes Hoesflot Klaebo. Il Norvegiais ha battì en il final il Russ Sergey Ustiugov ch'è vegnì segund ed il Franzos *Richard Jouve* ch'è vegnì terz. Klaebo ha uschia gia triumfà quatter giadas a Tavau.

Ils megliers Svizzers en questa cursa da sprint èn stads Roman Schaad (9avel) e Valerio Grond da Tavau (11avel). Omadus èn vegnids fin en il mezfinal. Per Dario Cologna è il sprint gia stà a fin suenter la qualificaziun. (rtr/fmr)